

傳  
經  
室  
文  
集

傳經室文集卷四

元和朱駿聲著

吳興劉承幹校

書說

卽尙書學序

孔子序書百篇自秦焚後亡者四十三篇彙飡帝告釐  
沃湯征汝鳩汝方夏社疑至臣扈仲虺之誥明居徂后  
太甲三篇沃丁咸父四篇伊陟仲丁河亶甲祖乙說命  
三篇高宗之訓分器旅巢命微子之命歸禾嘉禾蔡仲  
之命成王政將蒲姑周官賄息慎之命亳姑君陳康王  
之誥君牙罔命是也餘五十七篇漢建武時又逸其一

武成是也至西晉永嘉之亂逸者又二十六篇舜典汨  
作九共九篇大禹謨益稷五子之歌允征湯誥咸有一  
德典寶伊訓肆命原命泰誓三篇旅獒畢命是也亡逸  
凡七十篇僅存三十篇則堯典連慎微以下皋陶謨連  
帝曰來禹以下禹貢甘誓湯誓盤庚三篇高宗彤日西  
伯戡黎微子牧誓洪範金縢大誥康誥酒誥梓材召誥  
洛誥多士無逸君奭多方立政顧命連王若曰以下呂  
刑文侯之命費誓秦誓是也東晉枚瓊所獻僞本於真  
書三十篇中割堯典之半以當舜典割皋陶謨之半以  
當益稷依馬鄭分顧命之半以當康王之誥是爲三十

三篇而妄於秦焚久亡之書造仲虺之誥太甲三篇說  
命三篇微子之命蔡仲之命周官君陳君牙囻命十三  
篇於建武永嘉散逸之書造大禹謨五子之歌允征湯  
誥咸有一德伊訓泰誓三篇武成旅獒畢命十二篇故  
今五十八篇中凡眞書三十三篇實三十篇僞書二十  
五篇疑皆皇甫謐摭摭他書所引依傍爲之閒有杜撰  
者也厥後蕭齊姚方興又造舜典首十二字隋之劉炫  
復造潛哲以下十六字則又作僞之末流重生臆謬者  
矣皇甫謐帝王世紀王肅家語及聖證論東晉汲郡紀年皆暗與晚書說合亡書有殘章賸  
句見於典籍所引者如商書帝告見尙書大傳湯征見

孟子史記仲虺之誥見左傳墨子荀子太甲見大學緇  
衣說命見學記文王世子坊記表記喪服四制論語  
孟子墨子尸子離騷呂覽史記潛夫論說苑周書如  
嘉禾見漢王莽傳蔡仲之命見左傳逸周書作雒周官  
見周禮注周禮疏引鄭志漢百官公卿表賈誼傳君陳  
見緇衣坊記春秋繁露君牙見緇衣而四十三篇之全  
文則漢儒已目所未覩故漢時存者惟伏生所授今文  
堯典連慎微以下皋陶謨連帝曰來禹以下禹貢甘誓  
湯誓盤庚不分篇高宗彤日西伯戡黎微子太誓不分  
篇牧誓洪範金縢大誥康誥酒誥梓材召誥洛誥多士

無逸君奭多方立政顧命連王若曰以下費誓呂刑文侯之命秦誓所謂二十九篇也其後又得孔壁真古文以較今文增多二十九篇則舜典汨作九其九篇大禹謨益稷五子之歌允征湯誥咸有一德典寶伊訓肆命原命盤庚分多中下二篇太誓分多中下二篇武成旅獒顧命分出康王之誥一篇畢命所謂五十八篇也其實止多二十四篇蓋盤庚太誓顧命伏本咸有惟不析篇弟耳且康王之誥實亡乃衛賈馬鄭於顧命分出當之者則實多伏本二十三篇也但此增多之真古文漢建武閒武成一篇又逸西晉永嘉之亂二十二篇盡逸

而太誓殘篇僅見史記周本紀中於是百篇之書祇存三十矣

尙書學凡例

一晚書不注但著其引用出處

一篇第仍依今本不以古目爲敘

一地名山水必注明本朝在何省何縣

一注中某某也某也上某爲段借下某爲段借字之

訓如尙上也高也言尙字借爲上字上字之訓則

高也此依詩毛傳壤木壤癭也調飢調朝也之例

餘仿此

一古注不專從鄭雖宋人說弗廢實事求是頗有折衷

一逸篇之句閒有見於古書所引者零章斷句既無全文或難索解亦復略之

一注中某某也猶某也所謂猶者皆轉注之誼如既汔也猶盡也汔之本訓爲水涸其引申之誼則爲盡也稽計也猶考覈也計之本訓爲會算其引申之誼爲考覈也

### 夏小正補傳序

堯典授時而後紀候之書小正爲古孔子曰我欲觀夏



道是故之杞而不足徵也吾得夏時焉史記夏本紀孔子正夏時學者多傳小正汲冢紀年禹元年頒夏時於邦國稽厥勳宜列經典顧其篇僅具大戴禮記中而漢以後大戴不立學官書未尊顯古注闕如至宋傅子駿得關雎所藏單行本以校戴書乃取經與傳之錯廁混淆者釐而訂焉然斯傳之作疑出公羊穀梁二子手筆思表纖旨與春秋傳異曲同工實非延君饒著也知者大戴所存三十九篇皆述而不作不應獨釋小正且萬用入學傳稱今時大舍菜夫大舍菜禮秦漢寢已不行所言今時宜謂春秋時矣余慚龔陋而性嗜古小時

讀黃叔琳輯本繼復閱近儒著述擇善而從因心爲則  
手稿一冊以課家僮問業者見而善之遽爲授梓爰墨  
數語于帙覲博通之士有以裨補其闕失云

小爾雅約注序

詁訓之書權輿爾雅自後小爾雅方言說文解字釋名  
廣雅廣之而小爾雅十三章最古亦六籍之襟帶百氏  
之網維也漢志列孝經家隋志附論語類皆別爲一  
卷不著撰人名氏而藝文類聚引作孔叢晁公武謂孔  
子古文見於孔鮒書今館閣書目云孔鮒撰卽孔叢子  
第十一篇然孔叢一書不著前志殆魏晉人依託而

取小爾雅入之其間如走爲我之類或有附益亦難悉  
懷詩疏選注多所援引或稱小雅或稱爾雅則省文也  
爲之注者東晉李軌解無傳北宋宋咸注頗略近吾鄉  
宋翔鳳嘉定葛其仁均有疏證犁然燦然余復取陶宗  
儀說郛何鏜漢魏叢書及余有丁孔叢子縣眇閣本耶  
奎金五雅堂策檻本陳趙鵠爾雅台刻聽鹿堂本胡文  
煥百名家吳瑄古今逸史吳永續百川顧元慶文房本  
鉤稽異同審慎裁補誼會其通說反乎約仍錄爲一卷  
以資循覽焉

孔子三朝記序

昔朱子答張敬夫云至於文字之間亦覺向來痛病不  
少蓋平日解經最爲守章句者然亦多是推衍文義自  
做一篇文字非惟屋下架屋說得意味淡薄且使人看  
者將注與經作兩項功夫做了下梢看得支離至於本  
旨全不相照以此方知漢儒可謂善說經者不過只說  
訓詁使人以此訓詁玩索經文訓詁經文不相離異只  
做一道看直是意味深長旨哉斯言朱子之所以卒爲  
大儒也孔子三朝記七篇具大戴禮中前四篇盧僕射  
無注後三篇注頗疏略今臨海洪州倅頤煊學持根柢  
諸所著述具有家法吹詮斯記紹美前修非向壁之陋

儒實升堂之通士披涉心賞敘而授之手民

維時陪臣執國故干乘言設官之制也議用田賦故  
四代言政刑之法也君弱臣強故虞戴德言三常之  
禮也桓僖宮災故誥制言事神之節也邾獻亳社故  
小辨言禮樂之政也吳齊郊戰故用兵言禍福之原  
也四世失政故少閒言君臣之分也夫魯爲望國至  
於春秋而桓公以弟弑兄文姜以妻弑夫羽父慶父  
仲遂以臣弑主意加以臣逐君文姜以妹而淫於兄  
哀姜以嫂而通於叔穆姜以君母而報於臣悖亂極  
矣然孔子曰魯一變至於道何也蓋魯之亂在上而

其下之人心風俗猶尙近古故其後二百餘年國亡  
至楚漢相爭漢兵圍魯尙聞詩歌之聲則周公之遺  
澤不能留於子孫而尙留於草野可知所以然者魯  
典籍具存流風未歇韓宣子曰周禮在魯仲孫湫曰  
猶秉周禮而齊人誦魯之歌且曰惟其儒書爲二國  
憂孔子此記求治之大綱小紀燦然具備惜乎事勢  
凌遲空言莫補亦徒爲儒書之傳後耳


### 刻參同契序

參同契者東漢上虞魏伯陽所撰也書成密示青州從  
事徐景休景休爲之注至桓帝時授同郡淳于叔通乃

行於世考說文易字注引祕書說日月爲易蓋契下篇  
之語時書未行故謂之祕許君博采通人伯陽亦其一  
矣書理誼與衍文辭該贍音韻雅古段周易爲論說而  
非擬經取人倫以罕譬而非導注舉納音以紀名而非  
遜甲淵懿遂嘖一歸於正洵抱朴希夷之祖典而空同  
苦縣之演流學者深造自得之殆將與道大適迥非異  
端所爲教也第其書自後蜀永康道士彭皓妄分九十  
章割裂本經闕釋箋注散無友紀如墮雲霧中其自撰  
參同契明鑑訣一卷今亦不傳後儒大氏依據彭本而  
其間復有同異朱子晚年作者異一書亦謂疑晦未祛

夫欲甄理古書於千餘年後談何容易矧今距宋又五  
六百年乎余老而慕道喜讀其文病真本之不傳積夢  
寐而難紀箸離君灘之歲偶檢舊篋得先君手鈔古本  
如獲鴻寶先君子中歲精進學道歷有年所所錄珍祕  
遺書不翅數十卷余少壯寡昧置勿究心未省有茲善  
本今幸閱而稽之知卽通志藝文所載陰陽統略周易  
周參同契三卷參同契三相類一卷此朱子所未見者  
也按參者三也天地人三才也同者合會也契者大凡  
也言人身與天地二而一是書約舉其要取也三卽參  
也相類亦卽同也易其文耳又魏君自序委時四句隱



魏字魏從鬼委也化形四句隱伯字伯從人白也陳敷  
四句隱陽字陽从阜易也柯葉二句隱牒字牒从片桀  
也桀卽札也札卽契也末云吉人乘眞眞者僂人變形  
而登天也古文作今誤作負也安等長生等者所依  
據也古多借隱今俗作穩也此八字者以身教也鼎也  
迷難宿胸悵莫剖決幸睹手澤昭若發矇不能私表爲  
枕中祕函出授梓公之世云

古今韻準目序

音聲之遞變而遞轉也南北不同古今不同以今南北  
之不同又知古南北之亦不同故凡有韻之文隨其天

韻自錯律呂古無韻書書易詩騷卽韻書也自漢末魏  
初孫叔然勅爾雅亡我作反語而高貴鄉公以爲怪厥  
後聲類肇于李登韻集踵於呂靜而字始爲韻韻譜成  
於沈約切韻撰於法言而聲始有四顧其書率皆不存  
存者北宋廣韻爲最古言韻者舍是別無適從矣然二  
百六韻雖仍唐孫愐述六朝之舊而字數增倍當時以  
意彙竄實與唐韻大有出入況古韻乎廣韻三鍾恭字  
注云陸以恭  
縱等入冬韻非也  
此以意彙竄之證迨至南宋劉淵新刊韻略謬并爲一  
百七韻而元陰氏韻府羣玉又妄去拯爲一百六則微  
特盤於古韻且紊亂廣韻之部分欲由廣韻以上溯古

音而并不可得豈非重性以貶繆哉夫虞書熙起無平  
上周南芼樂無去入昔梁武帝聞周捨天子聖哲之對  
迄未信用不爲無見而唐元和後釋神珙之反鈕圖舍  
利之字母三十守溫變爲三十六凡末流之踵事鉅析  
更無論矣余旣成說文通訓定聲一書版之以就正有  
道鰓鰓焉又慮一百六韻之頒行四代簪爲功令諸應  
試排律所製必不能生今而反古之道也乃復取今韻  
而權衡之就一韻中析爲數類用韻者但取一類之字  
相叶庶宜今宜古不繆是非命曰古今韻準篤信好學  
之君子或有取於是焉

儀禮經注一隅序

聖經賢傳單詞隻字悉垂典要均足寶貴嘗鼎之味豈飽一嚮彰物之采詎尙片羽而在習業則有資始儀禮篇帙佚存十七昌黎博敏猶苦難讀與其不讀毋甯扁略僅冢小子性非穎特全經之授慮艱上口強澀記誦耗積時日妄率己意斷章節取經記注疏一隅是舉聊爲埠課速成非益剝裂鉅績敢忘其咎

六書段借經徵序

段借者六書之用段借因乎聲不審古音末由憭也上古字少故有段借秦火而後經師口授傳寫失真乃多

九雜典籍中十居二三學者僅而習之至老而不識其  
字者比比矣唐宋諸儒解經者輒望文生義以借字作  
正字遂至傳會遷就繆於古訓此讀書一大蔽也余嘗  
于諷誦時刺取其字爲叢記久之成帙因編次錄焉  
依陸氏釋文之例十三經應以易書詩三禮春秋三傳  
孝經論孟爾雅爲敘因弟子束髮授經多從四子書始  
故學庸論孟列于諸經之前

離騷補注序

離騷一百八十韻金相玉式豔溢錙豪爲後世詞章之  
祖荀卿賦篇瞠乎莫逮所謂智者勑物也有複句如紛

總總其離合心猶豫而狐疑世溷濁而不分兮好蔽賢而嫉妬世溷濁而嫉賢兮好蔽美而稱惡是也有複調如願竣時乎吾將刈延伫乎吾將反歷吉日乎吾將行雖九死其猶未悔覽余初其猶未悔雖解體吾猶未變孰云察余之中情孰云察余之善惡聊須臾以相羊聊浮游以逍遙聊浮游以求女日忽忽其將暮時曖曖其將罷及榮華之未落及年歲之未晏及余節之方壯是也有複字如朝夕凡六見靈修三見好修五見前修兩見修遠三見眾芳二見偷樂二見幽昧二見嫉妬三見抑志二見弭節二見前聖二見淹涕流涕三見余馬三

見陸離二見反顧二見中情三見余情朕情三見芳菲  
菲二見九歌二見保厥美委厥美三見淫遊二見康娛  
二見菹醢二見湯禹儼二見繩墨二見浮遊二見鬱邑  
二見延伫二見吾令六見繽紛二見歷茲二見世俗三  
見瓊枝二見偃蹇二見遠逝二見周流三見雲霓二見  
鸞皇鳳皇鳳鳥四見發軔二見求索二見上下四見亦  
何傷二見多艱二見度字四見憑字二見嫋字三見溘  
字三見羌字二見佩字八見響字四見是也有長句苟  
余情其信娉以練要兮是也又文選汲古本凡世字民  
字多以時字入字易之蓋依唐本避諱也道光丁未十

月養疴居內日臥誦屈賦閒起讀王叔師注有不慨于  
心者忘其舛陋輒爲補訂如左



傳經室文集卷四

傳經室文集卷五

元和朱駿聲著

吳興劉承幹校

臨嘯閣詩餘自序

采明珠於海外挂席無風巢飛雀于樓中穿簾有月吹  
愁龍笛紅淚四飛咽恨虬籤青絲千結生而善病悟水  
部之前身長亦言情愛玉臺之新詠寫纏綿而盡致借  
拍散以流音種來優鉢之花春人易感踏徧兜羅之彩  
秋士多悲則有璚瑁筵前玻璃屏畔荃蘅香裊死央翳  
翠之幃薜茏期新瓔珞珊瑚之幕瑤粉傅壁玉廳佐肴

吹絃嶺之鶴笙桂旗颺碧奏秦臺之鳳管蘭袖翻紅非  
云有語皆香固已無情不豔芳草淥波夕陽古道驪駒  
乍唱假絲竹以喻懷錦纜初牽贈瓊瑰以結佩一聲河  
滿千縷情絲三疊渭城兩行淚玉江文通一賦直其然  
乎李都尉數言誰能堪此東風起西月沈開畫閣敞銀  
屏蝶夢不來寄相思兮千里鵲愁易化問前事于三生  
金鴨睡而桂炭消玉蟲飛而蘭膏暈繡簾不卷羅幃半  
張熒熒一鐙迢迢孤漏寫怨當歸之草緘愁將離之花  
又如柳絮飛榆錢簸水不風而自波花無雨而還墜一  
百五日鶯啼南陌煙寒二十四番艸引西池夢冷青衫

有淚誰邀青眼之人紅粉無愁倩拍紅牙之板物以時  
異情緣境遷齒蓓開而紈扇招涼梧桐落而銖衣闕雨  
仙人盤裏珠露聲沈王母簾邊玉波影澹夫容泣露美  
人遲暮之悲蟋蟀吟秋公子淒涼之賦此固蠻牋錦字  
供我魂銷檀板銀箏聞誰腸斷者也嗟乎一池皺水何  
事千卿千疊亂雲傷心惟此卽空卽色遙參兜率之天  
非豔非哀小署惜華之字從此落花片片休繞徐陵何  
妨虛箔垂垂更題韓偓旗亭賭徧待招畫壁雙鬟牙譜  
偷翻自擬靈芝九葉乙酉竹醉日惜花詞客書于臨嘯  
閣

朱氏支譜序

吳郡朱氏漢晉閒爲望族陸士衡詩八族未足侈四姓  
實名家所謂四姓朱張顧陸是也吾家自故明封光祿  
公逮於駿可系者才九世九世而上闕焉莫考駿父峇  
峰府君搜羅他邑宗譜至十數家覲先世之傳有以連  
綴貫徹而下而迄不可得謹案古皇朱襄氏渺遠難稽  
此朱之一也帝軒轅至曹安八世曹安至春秋邾子克  
十二世克至濞十五世國滅去邑氏朱徙沛此朱之二  
也五代史梁高祖爲舜臣朱虎後則左傳朱毛疑其裔  
此朱之三也東觀漢記云宋微子之後以國爲氏宋滅

奔碭易宋爲朱後遷南陽之宛爲東漢朱祐朱暉所自  
出此朱之四也通志氏族略朱有沛國丹陽永城吳郡  
錢塘義陽太康河南八望而鄧名世姓氏辨證沛國之  
派又自有丹陽義陽太康永城四望駿考朱襄朱虎及  
漢朱暉皆與吾宗沛國不涉吾宗蓋自邾滅於楚子孫  
去邑爲氏徙居泗水郡爲漢沛郡之相縣今江蘇徐州  
府宿遷縣是數傳遷吳至漢武時買臣爲會稽太守所  
謂富貴歸故鄉者以東漢之吳郡十三城西漢皆隸會  
稽故也又數傳至三國曰桓曰據桓領青州牧假節生  
異據爲驃騎將軍生熊熊生宣宣後至隋曰子奢居蘇

城飲馬橋仕唐爲宏文館學士數世至唐末曰茲者生  
四子次曰瓊次曰承厚瓊之曾孫曰長文承厚之曾孫  
曰昱昱裔子分居崑山元有德潤者官征東儒學提舉  
其六世孫希周明弘治進士南京吏部尙書贈太子少  
保諡恭靖自崑仍徙蘇城吳趨坊恭靖曾孫卽吾祖封  
光祿思親公諱相也駿聲爲公九世孫近獲觀樂園先  
生自敘支譜參互考訂爰知前有統而不紊後有緒而  
可賡謹輯斯譜以示來茲亦以成先君子博采旁搜汲  
汲未遑之志爾至徽國文公嘗讀其裔譜有茶院君自  
飲馬橋避居黃墩則亦子奢之派第原流不可晰究異

時綜覈得實庶復補綴云

按希周旁支未遷郡城者有天麟字遊初崇禎進士  
改翰林院編修甲申後唐王擢詹事順治四年永明  
王以禮部侍郎召之不至明年擢尙書尋拜東閣大  
學士乃謁王旋辭位七年王在梧州再召之奉命經  
略左右兩江土司明年四月從王之廣西病卒西坂  
卹

屏山朱氏重修支譜序

禮云別子爲祖繼別爲宗繼禰者爲小宗自世爵世祿  
之制廢而大宗小宗之法亡於是世譜興焉譜所以維



宗法之窮也隋唐時官有圖譜局爲專門之學宋以後  
乃家自爲之譜學不講則族姓散無友紀幾何不骨肉  
而塗人之秦越而肺附之乎昔劉誠意放周官太宰九  
兩五宗校定譜圖始祖而下系五世爲一圖以明五服  
之親第五世復列始祖之左下至九世爲二圖以明九  
族之親由九世而循次列之皆五九相承以暨於無窮  
此善法也雖然統譜之作難矣世世苗裔散在四方者  
訪之非一人之力而他譜有異同者稽之又非朝夕之  
事則勤而難成不若據小宗之足徵者家自爲書略於  
古而詳於今略於疏而詳于親世謂之支譜此亦善法

也黟屏山朱氏爲文公後道光戊申之秋修葺世譜獨  
詳唐末茶院君一支以迄於茲昏娶卒葬必以書有子  
無子必以書遷徙遐邇必以書而且壙墓有圖事實有  
傳予讀而善之謂可由小宗以追大宗由大宗以溯鼻  
祖尊祖敬宗收族基于是矣抑余嘗謂譜之廢廢于貧  
且賤者十之三而廢于富且貴者十之七富者或恥其  
家世之微則攀援著姓而強附之貴者或傲焉忘先世  
遺澤慮族之貧者覬覦其錙銖則惟恐遠之不速也夫  
富者旣強附人之宗而貴者又思急遠其宗于是譜雖  
存而實亡今屏山之成是譜也子姓名受一節藏于家

節各有字識乃別編字號爲總冊書某號譜藏某裔庀  
諸祠以備攷覈則庶乎非吾宗者不得附是吾宗者不  
得遠無前言之弊可以永永傳示子孫法不尤盡善歟  
其族之人多有聲于庠規言渠步無忝名家子繼繼繩  
繩昌熾殆未有艾也又按朱於漢晉閒爲吳郡望族至  
隋日子奢者家蘇城飲馬橋仕唐宏文館學士數傳至  
宋大儒樂圃公諱長文余祖也今讀是譜謂唐末自飲  
馬橋避亂徙歛篁墩則徽國亦宏文公之派第原流不  
可晰究云裔孫鏡蓉奉譜徵余一言因不辭而爲之序

屏山詩乘續集序

家集之編昉于趙宋三劉祖孫父子學行並茂後之人  
拾其傳文勵存崖略而已宋末柴氏四隱高才亮節益  
穆然見栗里遺風焉若詩歌之流播者段氏二妙則金  
人之清辭也許氏欵乃則元人之樂致也錢氏三華則  
明人之佳話也大抵一門之內文采風流輝映後先具  
有足傳于世者屏山朱氏爲晦翁裔孫辭章學問代有  
淵源多鉅人碩士伏海內雖潛德弗彰而流風餘韻於  
茲未墜嘉慶間賢裔吉中有詩乘之輯其叔謙山先生  
槩之以行仿史傳例不錄見存逮今又三十餘年其間  
歿者存者後來之秀者各有饌著彙之復哀然成帙足

以踵往哲而繼前徽和盦舍人善承家學念篤宗親數  
年來或錄諸楹書或訪諸蓬篚就名山之業成一家之  
言故家文獻蔚爲鉅觀佳士名篇綴於後勁余讀而稱  
善者再謂兢兢抱殘守闕之至意與夫孜孜敦本收族  
之盛心咸于斯乎在遂樂得而敘之

朱質齋

培文

桂林山房詩鈔序

桂林山房詩鈔者吾宗質齋茂才所自訂藁也君徽國  
文孫屏山居士生而早慧長乃益醇言成壇宇行束圭  
璧旣耕道而獵德亦華春而實秋出其緒餘發爲雋詠  
笙簧在手綺密則拔藻爲霞錦繡其腸俊逸則凌雲有

氣郁郁乎擲五際揜羣雅之才也方其壯心煙高激情  
風烈湖海之胸旣拓江山之助尤多搖嶽浚洲驅雲喝  
月戴幼公讀書精舍王子安作序名區泌滴黃公之灘  
屢屢庾勝之嶺曲江虞韶之石羊城越王之臺靡不恣  
厥遨遊挹其佳勝撫魚腸而虎趕攬馬首以龍睨邈焉  
驚風雨而泣鬼神燭三才而輝萬有矣若乃依人王粲  
不無侘傺之詞失職崔駰容有牢騷之語時則退而綠  
野遠性風疏家有青山澄懷雪潔廬鰲峰而講德席馬  
帳而橫經轡之以其文襮之以其藝惟夫過庭荀爽侍  
坐彭宣問字杜林受詩轅固罔弗資其規鉅倚以彫鏤

織雲錦而下濯雖川酌天漿而旁滋神漢是又季和師  
表汪如千頃之中有道人倫渺若重霄之上也謝光祿  
之明月門無雜賓王子敬之寒氈家祇舊物惟以著書  
爲事益多歌詩自娛時擁被以尋章或當筵而染翰古  
製則捐夫贗鼎新辭亦築其長城逸致神禪雅音適麗  
縱令揚子雲悔其少作枚少孺閒有俳詞正復抽祕騁  
妍不嫌斷錦謝華啟秀詎廢碎金僕仰謝士安作敘之  
能俛慚敬禮定文之託嬖妾鵠髮笑結謂之未忘卓犖  
鴻編擬杜糠之先導旣訢雜誦輒綴駢言

朱謙山鐘羣玉山堂文集序

前明以來專以八股取士而古文之學衰所子子乎賴以不墜者有數大家數十名家維持之雖不爲秦漢之文而于唐宋則已庶幾余謂文者古人以陳謨矢訓扶氣類明志節宏道而教俗非直以言詞爲工也矜纂組蒼叢儷青姬白之長弊弊焉從事于所無用以取悅庸眾人之耳目志于道者誠鄙而夷之余司訓古黜到官時繫馬堂階下卽知吾宗有謙山先生者讀書負奇氣以古文自豪然恨不及見其人今讀其集浸淫乎唐宋八家于律之疾徐抗墜靡不中節而所論著則皆有關世道人心之言其志度凝遠才氣宏放又融融煜煜揚



精騰光有不可遏抑之勢信乎所學有本非競爲浮詞  
勦說者可同年語也謙山以名孝廉偃蹇伏處不獲出  
其有用之學表見于功業而徒是箸述遺編傳之其人  
且又若存若亡于宇宙之內亦可慨已雖然自古富貴  
而名多澌滅惟博聞績學之士垂論箸以示來禩雖殘  
膏賸馥與江山同其永久文苟傳又奚憾焉其裔奉所  
藏稿將授手民余竊喜謙山之有後庶不至湮沒無傳  
也爰因其請而爲之序咸豐辛亥紀元太歲昭陽作噩  
星在鳥帑且月某譔

胡伯臣

文銓

詩集序

拾遺供奉而外稱詩家正宗者必推王右丞同時雖韋孟儲岑未能或之先也其自題輞川詩曰當世謬詞客前身應畫師說者謂畫者無聲之詩詩者有聲之畫其畫獨絕千古故其詩亦獨絕千古評其詩者或以秋水夫渠倚風自笑或以上林春曉芳樹微烘余謂右丞尤通佛理天機清妙脫然畦封如風簫之過也水月之印也香之於沈棧也果之於木瓜也酒之於建康也使人索之離卽之間驟欲去焉而不可得殆空諸所有而又無所不有者矣伯臣廣文博雅嗜學兼精繪事閒亦餐於禪悅無塵俗芥其胸臆有煙雲養其性情故其爲詩

時近右丞不期形似而神或肖之夫世俗之詩句鍛字鍊徒事翦刻以取工於一篇一韻之間正若絃弦於簧輓革以木泠淪無以別其器摯曠不能定其音反不如巫師覲女婦人孺子之嗚嗚喁喁者猶赴節而類情此其詩雖謂之非其詩可也伯臣自有其詩不必求合於古人之詩而鮮不自然有合於古人之詩之意是豈隨響附影爲發聲之變雜者可同日語乎抑史稱右丞闥門友悌多士推之伯臣於其同氣引瘖推溫綽綽有裕西堂春草之思往往形諸歌詠則其行誼亦於古人無少忤者余尤樂得其詩而敘之也

施秀亭

文鍾

詩集序

五言起而三百篇之詩亡八病興而十九首之詩又廢  
詩者中聲之所止也而意匠之所司也規摹音響之末  
點竄字句之閒志之弗存詩將安附夫李杜揚鑣不必  
與建安合軌韓蘇主盟不必爲開元繼霸何則時勢遷  
者感發異境地判者性情移譬之清風盪空而川谷殊  
響飛霜降夕而鐘磬互答涉樂方笑不能爲騷懷憂已  
歎非堪作頌者也秀亭施君綺齡終賈長而益豪文雅  
英雄珠璣在手中年拓落而風雲之氣不損終歲牢愁  
而神禪之致自得因寄有託矢諸詠歌詎謂洪音所奏

必合鱷魚之鏗鉅構斯皇當具驪龍之爪興若其宛轉  
附物怙悵切情懷天地之寥廓抒性靈之眞宰攬厥雄  
篇則士衡積玉拾其僞語亦安石碎金縱使枚郎中間  
有蕪詞揚大夫悔其少作正復司契含章佩華銜寶視  
世之衣冠優孟自附壇坫者眞賈之鼎致不侔矣僕承  
敬禮定文之託乏元晏作序之能不敢論甘而忌辛益  
蘄循川而至海他日凌雲之篇旣奏華陽之集方成當  
有金聲玉潤鼓吹休明揚鳳翽而徹雞林者豈一編所  
得罄其彫采又豈今日所可窮其崖裔哉讀旣卒業輒  
紱數言以贈焉

近月樓存稿序

疏傳之後有達人焉補鄉飲之章誦曲水之義世所傳  
廣微集與摯左並稱蓋典午一代詩人也詩含神霧曰  
詩者持也康成注禮曰詩猶承也竊謂詩言志以性情  
爲主而持之有學識承之有師傅大要不失乎溫柔敦  
厚之教者近是若真意不屬斤斤操葭黍圭臬以規仿  
於古人格律聲調之間遺神明而拾瀋滓吾未見其能  
工也故誦詩者必先論其人丹陽虞琴東先生系出元  
城先生天資亮特讀書目數行下嘗所諷者輒不忘自  
其少時爲詩已矯然殊絕於俗補博士弟子後卽貢成

均不屑屑倖功名爲亟務肆力于根柢之學洽覽通微  
益淵博無涯涘性不事家人生產日鍵其居戶口吟手  
披每至戊夜不輟其精勤有如此者適有辨難談古今  
事得失論人高下則縱橫踔厲抒所見時時屈其座人  
率亦以此遭忌謗其伉爽有如此者平生急人之憂遇  
旬貨雖黽勉無不應然屢有橫逆構釁至訟先生于官  
先生處之泰然陰詠不廢逮事解輒不知其所以然其  
惇篤有如此者中年失儷省曾子王駿之言終身不置  
媵暇則評了卯詩人詩心嚮往之其恬淡有如此者如  
此故其發爲詩也盎然而和疏而靜茂而有閒譬練湖

之蓄也其不汙譬沸井之達也其不窮無噍殺燕安敖  
辟之音無鏤鉤戍削枷縛之苦不專一家而壹以性情  
據其所學此其足以嗣響詩人而踵武其先哲焯然可  
傳于後無疑也且今世務爲浮僞儂薄之行見有顯爵  
高位或其人標榜足以致譽者則附和請爲弟子而於  
桐子之命傳道受業解惑之師轉而嘲之寢而逆之又  
其甚者而倍之比比皆是而先生之自命其集也獨以  
近月樓名近月樓者其師顏鶴照所居齋也先生尊聞  
行知在三之誼久而彌篤記所謂雖離師輔而不反者  
視世之浮僞儂薄超然無所摯于衷其爲人賢不肖何



如哉則信乎詩之有以持其志而承其師矣令子澧與  
余同爲黟縣教官戊戌之春將以先生詩壽之梨棗屬  
余序之令子植品績學如其先人斯序也不請之名公  
鉅卿而獨以命迂疏扼窮侘傺無聊之子彼其性情學  
識亦所云不隨流俗者耶余抑感先大父及先君子懋  
學敦行皆有經義若詩古文饌簪藏于家而不肖迄以  
困躓顛蹙未遑授諸梓以傳也序先生詩又泚然不知  
汗之何從也

平西域頌序

我朝自乾隆閒平定回疆以來六十餘年濛汜我池昆

俞我阜聲震無雷之國悉主悉臣光臨不夜之城吾胞  
吾與詎有陽泉陰獍自外生成短蜮長虵敢于蠢動者  
逆裔薩木薩克之子張格爾始則伏穴西藩繼思游魂  
內地寄殘喘于安集延之外疆又生羆煽么磨及布魯  
特之人蛩還負蟹於道光六年七月誘阿爾圖什回子  
跳梁沙漠犯順邊陲竊破喀什葛爾英吉沙爾葉爾羌  
和闐四城忘其蛄春菑朔之危肆夫猗突狼奔之勢一  
隅可負竟爾鴟張四顧自雄陰思蠶食且有窺伺阿克  
蘇之志焉 皇赫斯怒我武惟揚萃兩省之貔貅軍興二  
萬濟八旗之熊虎師試三千親授訐謨特簡上將以長

齡爲揚威將軍楊遇春武隆阿爲參贊大臣統陝甘諸路大兵暨吉林黑龍江勁旅芑鉦被旄電掣星馳九天九地之兵戈矛照月四正四奇之陳旌旆生風明年三月我師在渾阿爾巴特遇賊敗之進至沙布都爾大敗之又進至阿瓦巴特連敗之天網三驅直搗不毛之地星旂七萃如入無人之鄉拉朽摧枯一月三捷雉藏鼠竄萬死半生方四城克復之時固一朝翦滅之會惟是撥麤摧腐鋌鹿已窮飛炬衝煙連雞失勢 天子重勞師旅軫念兵民謂窮鳥逃林不必焚巢之急枯魚泣釜無須布罟之勞命烏什以西量留官兵戍之其餘以次凱

撤旣昭聖武亦邕皇仁然而孤禿盈凶合就燃臍之戮  
五旛遺孽難逃傳首之誅鴟未變其惡聲狐猶逞其嫫  
伎天奪之魄時復生心冬十二月己亥將軍偵知張格  
爾將乘歲終入卡爲亂土皆隼疾憫然爲一昔之期時  
維鷹揚闖焉入三危之地跼鷲夜渡驚大兵之有神闕  
虎朝鋪料孤注之無路蝸晴思觸迤邐從阿坦台而來  
螳斧先摧窮追至鐵蓋山之下超距之徒踰嶺侏儻之  
軀墜崖數月尸居一朝面縛當元惡就擒之日正大除  
改歲之辰天且弗違民皆稱快在昔周宣北伐近在太  
原殷武衰師不踰荆楚而詩詠玃狁之六月易陳鬼方

之三年詎若茲算稟九重開網有自投之獸地踰萬里  
破竹無九頓之鋒象示參旗七日聞其吉語驛飛露板  
一句達于長安誰能去兵聞諸左氏之語我戰則克有  
如孔子之言盡殲巨魁永綏邊徼環瀛喜洽戴斗愉騰  
一曲鐃歌聽策勳于太史兩階干羽仰媲美于中天小  
臣無骨封侯幸際軒祁之武烈有心報國慚非韓柳之  
文章謹志五言聯成百韻

郭年伯雲逵舍人八十壽序

蓋聞化醲酒郡守閣圖令艾之容春到鳳池門闕誦思  
東之句姑幕徐廣猶讀五經山陽尉元宜處三老靡不

燥身浴德玉色金聲故能履福衡而登壽車享麋梨而  
躋鮐蜚者矣洪惟雲逵先生有道清門細侯高廩胸藏  
二酉身是金僊腹有三壬生徵壽骨旣耕道而獵德亦  
華春而實秋平與之二龍皆才南頓則五行並下仰僧  
彌以知法護擢越石而偕楚金洵洞林之鉅儒亦燕臺  
之上客也董昆進德允宜上計之書孟喜譚經蚤中孝  
廉之選乃者雕龍匿采霧豹潛光饒泉明羲皇之思兼  
陳登湖海之氣雖復署銜雞樹領職薇廳羣知李嶠之  
才文章宿老爭識仲舒之博古事瀾翻而天上五花人  
閒一佛青規得地賜錦便還丹轂忘情杜門卻埽豈非

九旋之淵鯢潘未足窮其深千頃之波澄撓莫能遷其  
性者哉是故觀金心之在中驗黃髮之受祉采之中論  
厥有三端當嚴尊觀察敷厯外臺紀綱庶愼君常澣  
旃舍北佐餽站南庠池雁門之區犵鳥獐花之地近臨  
瀾水遠陟珠崖藉令效王謝之輕華慕原嘗之豪舉逐  
名聲于韁鎖捐幽贊于弦韋觴酌淩波其前絲竹抗墜  
其後詎不足以駕八廚之名士傾四姓之小侯而乃遠  
性風疏清脩雪絜吳祐廩汗青之載王駿謝衣囊之名  
荆州胡威敬問匹縑湘川孝緒不營官紙史稱令子君  
有同風矧乎萬石之門三朝孝子惟孝八斗之才一世

益斲多蒲柳緝溫舒之經綺紉非班伯之好黼藻道德  
醞釀中和則所謂聲聞之壽不爽不忘者焉洎夫息意  
時榮怡神家衡畫孝友之傳著清白之銘肅太邱之門  
風飭顏氏之家訓庾詞能對折彼委笄綜絹可遺撻其  
命駕所以寶家有丹桂之挺馬氏皆白眉之良分長孺  
之一經舉張詹于七世展驥則公才公輔銜鯁則經師  
人師薈三虎之炳文總五鳳之齊翼抑且晨集問安之  
輩不辨羣孫晝聽傳呼之聲已見四代庭誥肅若德星  
蔚然此所謂王澤之壽九疇首福者非歟今夫觥觥者  
言爲壇宇巖巖者行有枝葉神峰內峻道宇外張隨武



子之治家動有軌憲謝光祿之接物門無襍賓然而大方無隅上善若水呵祖約之障麓嗤濬冲之散壽雲心兩人起膚寸而亦霖柏性茂族處巖阿而猶蔭江秉之瞻親串寇子翼之周故人券或焚于遺奴田則呼其續命尤澤衷之極則見穆行之芳型豈與夫蹉跎爲仁蹴躡爲義可同年而語乎是又行道有福方受九寸之符陰德所基應握期頤之算所謂行仁之壽論符偉長者也至若渡蠅驅鵠以生物爲心梵夾貝多亦達人所喜早議小山之饌閒持蘇晉之齋清暉懿芬錫羨凝嘏于以拍肩于四皓八公之側抗手于三山五竺之間引

翼曼釐慶昌枝裔豈不宜歟某等承乏珂鄉飫聆斐德  
表正開夫弟八歲豫頌夫千秋溯旗翼之儲精得酒以  
酉睹鸞龍之舞綵振美于辰斗注長生先紫陽之十日  
花餐益壽展彭澤之三旬慶衍自天仙行于地看此日  
松身鶴骨是汾陽二十四考之年華卜他時蘭檢芝泥  
襲羅侯一百七旬之歲月是爲序

李春圃明府六十壽序

方今聖天子鴻開壽寓寰周騰嵩嶽之呼龍紀重光函  
夏縵星雲之彩五百年必有名世值申伯之生辰八千  
歲以爲春秋邁亥文之算甲經濟本文章巨手一代偉

人宰官卽菩薩現身萬家生佛如我春圃老伯大人者  
根蟠仙李節仰時苗孫康之序維三馬氏之良第一慕  
婁公盛德得鄉先輩宗風仕僕射遺陂有古聞人遠志  
倘爾雲霄而上定魁著作之班乃以金鏞石鼓先聲爲  
墨綬銅章初步廿年拔萃曾空伯樂之羣半刺剖符止  
遙益州之夢在郭元振初年作尉聊藉驚棲而裴子餘  
當路知名便看驥展則有長平古治上黨名都山近北  
樓城開南解署條銜於司馬車試緹油躡仙履於飛鳧  
庭閑葢杖卽以通班資格晉秩參軍還因佐郡賢能之  
官神武地是邊關衝要星參野而域冀州人如太守清

閒臥長孺而嘯成瑱夫兩郡疊經捧檄祗贊龔黃一堂  
雖聽鳴琴權知緊赤及報三年之最迺徵百里之才星  
旆西發晉陽雷封北膺趙土博陵隄鞏千家之鱗屋胥  
恬廣漢名留四竟之鼠牙永靖崇德湖名賢世澤祠建  
二程鋤強悲鄰邑政聲關踰八度乃者時剛讀禮姓名  
先列御屏迨乎人記題詩需次旋膺帝簡洗眼到水雲  
深處汴州作宦杭州壯心猶寐雨當年易水移旌漸水  
安洲攝篆初遷蓬島名區尹賞多才復換薛恭大縣飲  
挹鶴湖之水弗教葦擷三秋遊停螽宅之舟那識蛤分  
五彩至其身披案牘手泐詞章膏黍恩濃憩棠人健自

能卻老何須井有丹砂其仰詒謀不讓家傳藍譜陳六  
條之策宣防既議建大蘇繒二妙之圖仕版亦名登小  
宋景祺有僕兼齒爵德而達尊三介社無疆備富壽康  
而錫極五看此日星聯旗翼荷九天稠疊之榮卜他年  
壽永蓬壺上百歲康疆之頌是爲序